

Morning Dogri (NSD) National News Bulletin 23-11-2024

आकाशवाणी

- महाराष्ट्र ते झारखंड च विधानसभा चुनां लेई वोटें दी गिनतरी दे कन्नै कन्नै 46 विधानसभा सीटें ते 2 संसदीय क्षेत्रें च उप-चुनां लेई बी गिनतरी जारी ऐ।
- प्रधानमंत्री नरेन्द्र मोदी होरें आखेआ ऐ जे हर मुख्य विकास लेई भारत कन्नै साझेदारी करना चाहदा ऐ।
- अमरीका च इक जज नै डोनाल्ड ट्रंप दे हशमनी मामले च सजा स्थगित करी दित्ती ऐ।
- चीन मास्टर्स 2024 च चिराग शेटी ते सात्विक सैराज रेंकिरेड्डी दी पुरुष जोड़ी सैमीफाइनल च पुज्जी गई।
- पर्थ स्टेडियम च बार्डर गवास्कर ट्रॉफी दा मैच जारी ऐ।

<><><><><><>

Vote Counting

महाराष्ट्र ते झारखंड च हाल च होए दे असैम्बली चुनाएं दरान पाए गेदे वोटें दी गिनतरी अज्ज कीती जा करदी ऐ। एहदे अलावा 13एं राज्यें दे द'ऊं हलकें ते 46 असैम्बली सीटें लेई उपचुनांS तैहत् पाए गेदे वोटें दी गिनतरी बी अज्ज गै करोआई जा'रदी ऐ। 288 सदस्यें आहली महाराष्ट्र विधानसभा लेई मतदान इक्कै गेड़ तैहत् 20 नवम्बर गी होआ हा जिसलै के 81एं सदस्यें आहली झारखंड असैम्बली लेई मतदान द'ऊं चरणें तैहत् जंदी 13 नवम्बर ते 20 नवम्बर गी होआ हा। वोटें दी गिनतरी आहली प्रक्रिया गी बवस्थित ढंग्गै सिर तोढ़ चाढ़ने लेई सुरक्षा दे निगगर बंदोबस्त कीते गेदे न। मतदान केन्द्रें पर केन्द्री बलें, राज्य पुलिस ते होरनें सुरक्षाबलें गी बी तैनात कीता गेदा ऐ। झारखंड ते महाराष्ट्र असैम्बली चुनाएं दे नतीजें लेई रुझान औने शुरु होई गेदे न। महाराष्ट्र दिएं 288 सीटें चा 59एं दे रुझान आई गेदे न।

महायुती गठबंधन च

बीजेपी 36 सीटें पर अगगे चला करदी ऐ

एकनाथ शिंदे हुंदी अगुवाई आहली शिवसेना 10 सीटें पर अगगे ऐ।

अजीत पवार हुंदी अगुवाई आहली एनसीपी फिलहाल 4 सीटें पर अगगे ऐ।

दुई बक्खी महा विकास अघाडी च,

कांग्रेस 3 सीटें पर अगगे ऐ।

इस्सै चाल्ली झारखंड च, कुल 81एं सीटें चा अजें 35एं सीटें दे रुझान हासल होए दे न।
इंदे चा बीजेपी 20 सीटें पर जिसलै के एनडीए दी भ्याल पार्टी ए.जे.एस.यू 5 सीटें पर अगगे ऐ।

दुई बक्खी सत्ताधारी जे.एम.एम 7 सीटें पर अगगे ऐ ते कांग्रेस नै 3 सीटें पर बढ़त बनाई दी ऐ।

<><><><><><>

PM India

प्रधानमंत्री नरेन्द्र मोदी होरें आखेआ ऐ जे अज्ज भारत दुनिया दी सारे शा तेजी कन्नै बधदी बड्डी अर्थबवस्था ऐ ते दुनिया दा हर मुख्य विकास लेई भारत कन्नै साझेदारी करना चाहंदा ऐ। जर्मनी दे स्टगार्ट च मीडिया हाउस आस्सेआ आयोजित इक कार्यक्रम च वीडियो कांफ्रेंसिंग राएं संबोधत करदे होई उनें आखेआ जे अज्ज हर कोई भारत दी सामरिक महत्ता गी समझा करदा ऐ। “भारत—जर्मनी सतत विकास लेई इक खाका” विषय पर आयोजित इस कार्यक्रम च मोदी होरें आखेआ जे पिछले 10एं बरें च उंदी सरकार आस्सेआ लागू कीते जा’रदे रिफार्म, परफार्म ते ट्रांसफार्म आले मूलमंत्र दे कारण भारत उप्पर दुनिया दा भरोसा बी बधेआ ऐ। उनें आखेआ जे भारत नै हर क्षेत्र च नमियां नीतियां आंदियां न ते अपने आपै गी 21मीं सदी च तेजिया कन्नै विकास दी रफ्तार फगड़ने लेई तैआर कीता ऐ। मोदी होरें आखेआ ऐ जे 2047 तगर भारत गी इक विकसित मुख्य बनाने लेई इक मजबूत मुंड पाई दित्ता गेदा ऐ, जेह्दे उप्पर विकसित भारत दी विशाल इमारत दा निर्माण कीता जाग।

<><><><><><>

CBSE

केन्द्रीय माध्यमिक शिक्षा बोर्ड नै परिवार दी इक्कली इक्कली बेटी लेई योग्यता वजीफा स्कीम लेई पात्र विद्यार्थीएं थमां ऑनलाइन दरखास्तां मंगियां न। एह स्कीम इक्कली उनें कुड़िएं लेई ऐ जिनें सीबीएसई थमां 2024 च 10मीं पास कीती दी ऐ ते सीबीएसई कन्ने जुड़े दे स्कूल च 11मीं क्लास च पढ़ा करदी होए। एहदे कन्ने 2023 बरे आले सिंगल गर्ल चाइल्ड वजीफें गी नमें सिरैया कराने लेई बी ऑनलाइन दरखास्तां मंगियां गोइयां न। ऑनलाइन दरखास्तां जमां कराने दी खीरी तरीक अगले महीने दी 23 तरीक रखी गोदी ऐ। मते ब्योरे लेई मेदवार सीबीएसई दी वैबसाइट दिक्खी सकदे न।

<><><><><><>

Man Ki Baat

प्रधानमंत्री नरेन्द्र मोदी होर कल आकाशवाणी पर “मन की बात” कार्यक्रम राएं देश ते विदेश दे लोकें कन्ने अपने बचार सांझे करगंन। एह इस महीने रेडियो कार्यक्रम दी 116मीं किश्त होग। एह कार्यक्रम आकाशवाणी ते दूरदर्शन दे समूलचे नेटवर्क उप्पर ए.आई.आर. दी वैबसाइट उप्पर ते न्यूज़ ऑन एयर मोबाइल ऐप उप्पर प्रसारत कीता जाग। एहदे इलावा एयर न्यूज़, डीडी न्यूज़, पीएमओ ते सूचना ते प्रसारण मंत्रालय दे यूट्यूब चैनलें उप्पर बी सिद्धा प्रसारण कीता जाग। आकाशवाणी दे इस कार्यक्रम गी हिंदी प्रसारण दे तुरत मगरा क्षेत्रीय भाषाएं च बी प्रसारत कीता जाग।

<><><><><><>

India-Russia

भारत-रूस दे सैन्य ते सैन्य तकनीकी सैह्योग सरबंधी अंतर सरकारी आयोग, फौजी तकनीकी सैह्योग ते रक्षा उद्योग सरबंधी भारत-रूस कार्यदल दी 22मीं बैठक कल नमीं दिल्ली च होई। इस बैठक दी सह-अध्यक्षता रक्षा उत्पादन सचिव संजीव कुमार ते रूस दे सैन्य तकनीकी सैह्योग लेई संधीय सेवा दे पैहले उप-निदेशक ए.बॉयटसव होरें कीती।

<><><><><><>

Trump Sentencing Postponed

अमरीका दी इक अदालतै नै लालच देने दे मामले च डोनाल्ड ट्रम्प होरें'गी दित्ती गेदी सजा गी 2029 च उंदे राष्ट्रपति दे तौर पर दुआ कार्यकाल खत्म होने तगर अगड़ा पाई दित्ता ऐ। अदालतै इब्बी सुझाऽ दित्ता ऐ जे ओह दोषसिद्धि गी खारिज करी सकदे न तांजे ट्रम्प होरें'गी कानूनी पेचीदगिएं दे बगैर जनवरी च अमरीका दे राष्ट्रपति दा औहद्धा सांभने दी इजाजत थहोई सकै। डोनाल्ड ट्रम्प होरें'गी मई च स्टॉर्मी डेनियल्स हुंदे भुगतान गी कानूनी खर्च दे तौर पर गलत तरीके कन्नै दर्ज करने दा दोषी करार दित्ता गेआ हा जेह्दे नतीजतन उंदे पर 34 आरोप लाए गे हे।

<><><><><><>

PM Returns

प्रधानमंत्री नरेन्द्र मोदी होर नाइजीरिया, ब्राजील ते गुयाना दी सफलता पूर्वक यात्रा पूरी करने परैत नमीं दिल्ली पुज्जी गे न। प्रधानमंत्री होरें इस त्रऊं मुख्खें दे दौरे च केई द्विपक्खी बैठकां कीतियां। मोदी होरें अपने इस दोरे दरान वैश्विक नेताएं कन्नै 31 द्विपक्खी बैठकें ते अनोपचारिक गल्लबात च हिस्सा लैता।

<><><><><><>

Trump-FM

अमरीका दे नमें बने दे राष्ट्रपति डोनाल्ड ट्रंप नै अरबपति स्टॉक बेसेंट गी वित्त मंत्री दे रूपै च नामित कीता ऐ। की.स्क्वायर ग्रुप दे मुख्ख कार्यकारी अधिकारी ते इक अनुभवी निवेशक बेसेंट ट्रंप दे आर्थिक एजेंडे दा नेतृत्व करगन। जेह्दे च कर कटौती, संघीय घाटें पर ध्यान देना ते अमरीकी ऊर्जा प्रभुत्व गी बढ़ावा देना शामिल ऐ। ट्रंप नै बेसेंट दी इक शीर्ष आर्थिक रणनीतिकार दे रूपै च प्रशंसा करदे होई आखेआ जे ओह अमरीकी अर्थबवस्था आस्तै स्वर्णिम युग गी अगगे बधाने च मदद करगन।

<><><><><><>

IFFI

भारत दे 55में अंतर्राष्ट्री फिल्म महोत्सव च अज्जै दा ध्याड़ा बी मता खास रौहग कीजे अज्ज बी केई सारे कार्यक्रमें दा आयोजन करोआया जा करदा ऐ जेह्ड़े खरी मती गिनतरी च दर्शकें गी अपनी बक्खी आकर्षित करडन। कल 70 शा मती फिल्में दे प्रीमियर दी बड़ी मती कामयाबी दे परैन्त अज्ज बी 70 फिल्मां दस्से जाने दा कार्यक्रम ऐ। एह्दे अलावा ओपन-एयर स्क्रीनिंग दे इक हिस्से दे तौर उपपर अज्ज त्रै होर फिल्मां बी दस्सियां जाडन। ऊआं अज्जै दा सब्बनें शा बड्डा ते खास कार्यक्रम 'क्रीयेटिव माईड्स ऑफ टूमारो' आयोजन होग जित्थे इक नमीं फिल्म तैयार करने दी 48एं घैंटें दी चुनौती खत्म होग। इस ब'रे होआ करदे इस मुकाबले लेई फिल्म तैयार करने दिएं 13 बक्ख-बक्ख विधाएं आहले खेत्तर थमां 100 काबल नौजवानें गी चुनेआ गेदा ऐ।

<><><><><><>

Badminton

चाइना मास्टर्स बैडमिंटन टूर्नामेंट दे मर्दे दे डब्ल्स सेमीफाइनल च भारत दी शीर्ष जोड़ी चिराग शेट्टी ते सात्विक साईराज रंकीरेड्डी हुंदा मुकाबला अज्ज दक्खन कोरियाई जोड़ी जिन योंग ते सियो सेउंग जे कन्नै होग। चीन दे शेन्जेन च खेड्डे जा करदे इस टूर्नामेंट दे क्वार्टरफाइनल च भारती जोड़ी नै कल डेनमार्क दे किम एस्ट्रप ते एंडर्स स्कार्प रासमुसेन दी जोड़ी गी 21-16, 21-19 कन्नै हराया।

<><><><><><>

Cricket

क्रिकेट च, भारत ते अस्ट्रेलिया बश्कार 5 टेस्ट मैचें दी मजूदा श्रृंखला दे कल्लै थमां पर्थ स्टेडियम च खेड्डे जा करदे पैहले मैच दे अज्ज दुए ध्याड़े अस्ट्रेलिया दी टीम नै अपनी पैहली पारी च 9 विकटें दे नुकसान पर 96 रन्ज बनाए न। मेज़बान अस्ट्रेलिया नै अज्ज बड्डलै अपने कल्लै दे स्कोर 7 विकटें दे नुकसान पर 67 रन्जें शा अगगे खेड्डना शुरु कीता। तोआई कल खेड्ड दे पैहले ध्याड़े भारत दी टीम अपनी पैहली पारी च 150 रन्ज बनाई सकी।

<><><><><><>